

春秋左傳補注

春秋左傳補注卷第

二

賈服之注左傳猶康成之注六藝精確不可移易矣其地名有京相璠爲之注釋酈元水經注引之於三家說融洽貫通左傳學思過半矣元凱集解於漢晉諸儒解未能擇善而從其地理又未能揆度遠近妄爲影附此劉光伯規過之書所由作也東吳惠先生棟遵四代之家學廣搜賈服京君之注援引秦漢子書爲證繼先儒之絕學爲左氏之功臣余服膺廿載於惠君補注間有遺漏復妄參末議焉效子慎之作解誼家法是守鄙冲遠之爲疏證曲說鮮通是亦惠君所錄望於後學者也

乾隆五十九年五月十一日桐城馬宗璣

隱元年傳莊公寤生 眾經音義引倉頡篇云覺而有

言曰寤 元案寤即悟之假借說文寤逆也莊公當是逆產故驚其母耳

為之請制 郡國志河南苑陵有制澤酈元水經注苑

陵作宛陵苑宛古字通 元案今殿本水經注作苑陵酈元曰縣有

二城二城以東悉多陂澤即古制澤 元案請制之制一名虎牢見水

經注河水又東過成臯縣北下引春秋傳曰制嚴邑也號叔死焉即東號也顯棟高春秋大事表云在今

開封府杞水縣西郡國志制澤劉昭注云左傳宣十年諸侯遷於制田見水經注渠又屈南至扶溝縣北

下大事表云在今開封府新集縣東北自是兩地杜解不悞

不義不暱 說文引作不義不和和與勑通爾雅曰勑

膠也邵先生晉涵曰釋詁云膠固也言不義者不能

堅固故下文云厚將崩今本作不暱杜訓暱為親則

與厚將崩之辭不相屬矣。璉案南史梁帝紀論亦作不義不昵。

二年經紀子帛。案水經淮水注游水又東北逕紀鄆故城南。故紀子帛之國是酈元以帛爲紀子名也。

三年傳四月鄭祭足帥師取溫之麥。秋又取成周之禾。此傳用夏正之證。賈公彥周禮正義云周雖建子爲正及其行事皆用夏之正歲。

石碻諫曰。王符潛夫論曰石氏衛公族。

憾而能眡者鮮矣。說文云眡目有所恨而止也。戴侗六書故謂眡有忍意。

五年春經公矢魚於棠。釋例曰舊說棠魯地又土地。

名棠本宋地案水經注武棠亭下荷水所經

六年傳納諸鄂。郡國志河南絳邑古翼城詩譜言晉穆侯遷都於絳暨孫孝侯改絳爲翼翼爲晉之舊都酈元汾水注詳言之惟鄂地未詳世本云唐叔虞居鄂宋忠曰鄂今在大夏案大夏在晉陽縣唐叔始封之地史記晉世家晉哀侯九年曲沃武公伐晉侯于汾旁虜哀侯是鄂地在汾旁之證計其地去晉故絳都亦不甚遠故鄂侯之子仍號爲翼翼侯亦鄂近翼翼城之證

周任有言 馬融論語注周任古之良史

八年經遇于垂 京相璠曰今濟陰句陽縣小城陽東

五里有故垂亭鄆元曰小城陽在句陽城東半里許
杜註未詳

傳以泰山之祊易許田 詩閟宮篇居常與許毛傳以
許爲魯西鄙之邑鄭箋以許爲許田桓元年卒以許
田與鄭矣無緣復爲魯有也魯頌多侈言之耳

公命以字爲展氏 禮記正義云適夫人之子則以五
十字伯仲爲氏若魯之仲孫季孫是也庶子妾子則
以二十字爲氏展氏臧氏是也異姓則以父祖官及
所食之邑爲氏以官爲氏司馬司城是也以邑爲氏
韓趙魏是也凡賜氏族者此爲卿尋賜有大功德者
生賜以族若叔孫得臣是也雖公子之身若有大功

德則以公子之字賜以爲族若仲遂是也其無功德
死後乃賜族若無駭是也璉案仲遂分晰氏族甚有
條理適夫人之子伯仲爲氏惟魯然耳列國如鄭伯
弟語秦伯弟鍼皆不以叔仲爲氏也

十一年傳及大逵 爾疋九達謂之逵劉光伯云九道
交出也杜注鑿

不書于策 正義云蔡邕獨斷云策簡也其制長二尺
短者半之其次一長一短兩編下附鄭注中庸亦云
策簡也蓋簡策同物而異名單就一札謂之簡連編
諸簡乃名爲策聘禮記曰百名以上書于策不及百
名書於方名字也字少則書簡字多則書策璉案疏

言甚晰若鄰國來告有篡弑兵荒之事則書於策衛
寧殖所謂名藏在諸侯之策如國內有亂但執一片
之簡而可書者則先書於簡南史氏執簡以往服虔

注古文策書一簡八字是也

元案小雅出車傳鄰國有急以簡書相告王制

太史執簡記知事無大小皆先書於簡逮歲月稍久
記載滋多則屬比連綴爲策而藏之故書多言簡藏
必言策也

桓二年經取郟大鼎於宋 闕駟十三州志曰今成武

縣東南有郟城俗謂之北郟者也

棗食不鑿 詩召旻鄭箋云米之率糲十稗九鑿八侍

御七正義引九章算術云粟一石爲糲米六斗春糲
一斗爲稗九升又去爲鑿則八升又春爲侍御則七

升生民篇正義云米之細者乃窮於御經傳說祭祀

之饌無言御米者不鑿是不用御米元案說文穀部

爲九斗曰粢徐錯繫傳曰春秋左傳黍食不鑿字當作此

鞞鞞 詩理琫毛傳云下曰鞞上曰琫言德有度數也

正義云鞞者刀削之名琫者鞘上飾下不言其飾指

鞞之體故曰下曰鞞左傳正義曲從杜解云飾有上

下先鞞後鞞故知鞞爲上飾鞞爲下飾顯與詩毛傳

正義相背劉光伯以毛傳規杜甚當

錫鸞和鈴 禮記鄭注引韓詩內傳云鸞在衡和在軾

前周禮疏引韓詩傳云升車則馬動馬動則鸞鳴鸞

鳴則和應讀詩記引韓詩曰在軾曰和在軛曰鸞後

漢書志補注引干寶周禮注云和鸞皆以金爲鈴
其弟以千畝之戰生 顧亭林曰千畝當依趙世家周
宣王伐戎及千畝括地志所謂在晉州岳陽縣北九
十里是也閻百詩辨之曰千畝乃周之藉田離鎬京
應不甚遠括地志所言太遠璉案郡國志太原介休
有千畝聚劉昭言晉爲千畝之戰在縣南括地志謂
晉千畝在岳陽甚當是戰乃晉勝敵非若周宣之戰
乃敵勝周百詩誤以爲周宣千畝之戰證其宜在藉
田非是

怨耦曰仇 三倉云讎對也衆經音義引李巡爾疋注
曰仇讎怨之對也

三年傳芮伯 書序芮伯作旅巢命詩桑柔正義引鄭
注芮伯周同姓國在畿內

五年傳周公黑肩 荀子云周公歸周楊倞注云畿內
之國亦名周周公黑肩其後也

六年傳故奉牲以告曰博碩肥臚 周禮封人歌舞牲
先鄭注封人主歌舞其牲云博碩肥臚康成謂君牽
牲入時隨歌舞之言其肥香以款神也是奉牲以告
乃封人奉牲而歌舞之辭

親其九族 古尙書說上至高祖下至元孫凡九族尙
書歐陽說九族乃異姓杜從歐陽說正義引鄭康成
辨九族宜從古尙書說甚詳當據之以解此文九族

正義乃曲爲杜解何也

先君獻武廢二山 杜注二山具敖也郡國志濟北盧

縣有敖山

八年經祭公來 韋昭國語注祭畿內之國周公之後
爲王卿士廣韻以祭爲周大夫邑名周公第五子祭
伯其後以爲氏以魯爲宗國故來朝

十二年傳盟於句瀆之邱 酈元曰濮水又東與句瀆
合瀆首受濮水枝渠於句陽縣東南逕句陽縣故城
南春秋之穀邱也左傳以爲句瀆之邱矣

十三年傳徂於蒲騷之役 爾疋徂後也詩疏引孫炎
云徂伏前事復爲也蒲騷之役在前故云徂復爲之

羅與盧戎兩軍之 鄭元曰夷水導源中廬縣界東南
流歷宜城西山謂之夷谿又東南逕羅川城故羅國
也中廬卽廬戎國是羅與廬戎本鄰國故合謀以敗
楚師章懷後漢書注中廬故城在今襄州襄陽縣南
十四年傳伐東郊取牛首 司馬彪郡國志魯國有牛
首亭劉昭補注云宋伐鄭取牛首卽此案鄭地不得
至魯國此劉昭謬注鄭元曰沙水又東南逕牛首鄉
東南魯溝水出焉亦謂之宋溝又逕陳畱縣故城南
溝水上承沙河而西南流逕牛首亭南與百尺陂水
合是牛首地在陳畱縣界之證

爲廬門之椽 案呂覽楚莊王圍宋却四十里而舍於

盧門之闔是盧門乃宋外城門去宋都城四十里顏氏家訓載徐仙民左傳音切緣爲徒緣反釋文不載但音直專反徐音蓋古音也

十六年傳壽子告之 齊詩衛宣公之子壽閱其兄汲之且見害作憂思之詩黍離之詩是也

御覽

築王姬之館於外 後漢荀爽傳春秋之義王姬嫁齊使魯主之不以天子之尊加於諸侯也

十八年經公會齊侯於濼 說文濼齊魯閒水

莊元年經齊師遷紀邢鄆鄆 案鄆國志朱虛屬北海

非屬東莞正義據釋例土地名朱虛亦屬東莞晉郡

縣改屬也

元案後漢有北海郡無東莞晉有東莞郡無北海晉書地理志東莞武帝太康元年

增
置

三年經紀季以鄒入於齊 續述征記云女水至安平
城南伏流一十五里然後更流注北楊水城城故鄒
亭也按此是鄒亭在齊國東安平縣南十餘里
四年經享齊侯於祝邱 司馬彪郡國志曰琅邪卽邱
春秋時曰祝邱鄭元曰沐水又南逕東海郡卽邱縣
故春秋之祝邱也

傳除道梁澁 鄭元曰澁水又東南逕隋縣故城西
五年冬齊人來歸衛寶 史記衛世家成王舉康叔爲
周司寇賜衛寶祭器以章有德

八年傳戍葵邱 京相璠曰齊西五十里有葵邱若是

無庸戍之胡廣言汾陰有葵邱或山陽西北葵城案
汾陰漢屬河東爲晉地山陽爲邾魯二國地齊境不
至此齊桓會諸侯於葵邱杜注葵邱在陳畱外黃郡
國志亦云外黃有葵邱聚案此葵邱爲齊宋交界之
境亦爲中原襟要之區故齊襄使二人戍之若如杜
注在臨淄縣西雖期年公問不至何至於作亂京君
疑之是也

田於貝邱 京相璠曰博昌縣南近澠水有地名貝邱

在齊西北四十里地近又有內應故易於作亂

元案水經

河水注云大河故瀆又東逕貝邱縣故城南應劭曰左氏傳齊襄公田於貝邱是也余按京相璠杜預並言在博昌卽司馬彪郡國志所謂貝中聚者也應注近違據此是鄭說與京杜合

公孫無知虐於雍廩 史記齊世家注賈逵曰雍廩葵

邱大夫昭十年傳齊渠邱實殺無知正義引鄭眾說

以渠邱為無知之邑據鄭眾說及左傳文是史記引

賈注葵邱正渠邱之譌渠邱本無知邑雍廩為渠邱

大夫時無知虐之故雍廩懷憾而殺無知元案葵渠聲相近渠

邱即葵邱蓋無知私邑而連稱管至父成之故得因以作亂也

九年經冬浚洙 酈元曰泗水又西南流逕魯縣分為

二流水側有一城為二水之分會也北為洙濟

公敗宋師於乘邱 應劭地理風俗記曰濟陰乘氏縣

故宋乘邱邑漢志泰山郡乘氏縣顏籀注公敗宋師

即此地璉案魯師自雩門竊出以敗宋師雩門魯城

門則敗宋師必在魯之近郊括地志云乘邱在瑕邱縣西北水經泗水注泗水西南逕魯縣北又西過瑕邱縣東瑕邱與魯縣接界則乘邱爲魯近郊地故元凱直斷爲魯地濟陰乘氏應劭張華酈元雖皆言爲春秋之乘邱非魯近郊故未有言魯敗宋師於此小顏注不足據惠棟反據此以駁元凱魯地之非亦誤禮記正義亦云乘邱魯地

傳自雩門竊出 案酈元泗水注雩門南隔水有雩壇故名曰雩門

十一年傳公以金僕姑 呂忱字林作鑠鐸魯矢名

十二年傳蕭叔大心 新唐書宰相世系表云宋戴公

子衍裔孫大心平南宮長萬有功封於蕭以爲附庸
宋萬弒閔公於蒙澤 酈元曰獲水又東逕長樂固北
己氏縣南東南流逕於蒙澤十三州志曰蒙澤在縣
東郡國志曰梁國蒙縣有蒙澤

十三年齊滅遂 酈元曰汝水西南逕遂城東京相璠
曰遂在蛇邱東北十里杜預亦以爲然然縣東北無
城以擬之今城在蛇邱西北蓋杜預傳疑之非也

十四年傳其氣燄以取之 石經燄作炎

妖由人興也 說文妖作媮云衣服歌謠草木之怪謂
之媮禽獸蟲蝗之怪謂之蠱此虵異亦謂之媮是妖
蠱可互稱許叔重說亦未確

寡人憾焉 服虔左傳注憾恨也字林云憾不安也

典司宗祏 昭十九年傳懼隊宗主服虔注云祏主藏

於宗廟故曰宗主說文云祏宗廟主也周禮有郊宗
石室一曰大夫以石爲主案此宗祏是鄭宗廟之主
亦以石爲之故字从石鄭之桓武世有大功得立厲
王廟昭十八年傳鄭大火子產使祝史徙主祏於周
廟周廟厲王廟也宗祏疑卽厲王主故言先君桓公
使其先人主之桓公厲王之子立其父廟宜也大夫
不得有主古春秋左氏說大夫以石爲主誤與說文
同鄭氏引少牢饋食正之衛孔悝使貳車反祏於西
圃與其衷甸紫裘同一僭禮不可引以爲證

十八年傳楚武王克權 世系表云商武丁之裔孫封於權其地南郡當陽縣權城是也

經有蝥 呂覽螟蚘高誘注兗州謂蚘爲騰音相近也淮南子沈州謂之騰高誘注騰讀近殆緩氣釋文云蝥本又作蚘玉篇蝥或蚘皆徒得切是蝥字本作騰因方言讀爲蚘耳後漢書孝明帝紀永平三年詔曰去其螟蚘章懷注蚘一名短狐徐楚金說文繫傳虫部蚘亦解爲短狐皆因元凱注而誤

十九年傳大敗於津 酈元曰羅縣西三里有津鄉應劭曰南郡江陵有津鄉東觀津鄉當荆揚之咽喉後漢書岑彭傳彭自引兵還屯津鄉當荊州要會

取為國之圃以為圃 一切經音義引三倉云養禽獸處曰圃倉頡篇云種菜曰圃

而葬於經皇 鬻拳為大閹是楚王守門之官經皇蓋楚寢門名以宣十四年傳屢及室皇在寢門之內證之可見葬於經皇蓋葬於楚王墓闕前象生時職守寢門之誼杜解未晰

廿二年經春王正月肆大眚 賈逵說是

傳風為天於土上杜注自二至四有艮象 觀六二闕

觀利女貞虞翻解曰艮為宮室坤為闕戶小人而應五故闕觀女貞李鼎祚曰六二商爻商為目又為中女外互體艮艮為門闕女自近門闕觀之象是杜解

自二至四有良象者蓋互體之義

廿三年士蔦曰 水經汾水注引漢上谷長史侯相碑
云侯氏出自倉頡之後踰殷歷周各以氏分或著楚
魏或顯齊秦晉卿士蔦斯其胄也

廿四年御孫 韋昭魯語注匠師慶掌匠大夫御孫之
名也璉案刻桷丹楹皆匠師之事故御孫諫之

廿八年經冬築郟 水經注濟水又北逕微鄉東春秋

經書冬築郟公羊傳謂之微

元案微郟聲相近

傳娶於賈 張華博物記曰河東臨汾有賈鄉賈伯邑

縣門不發 墨子備城門篇曰凡守城之法備城門爲
縣門機長二丈廣八尺爲之兩相如

鄭人將奔桐邱 水經洧水注洧水又東南逕桐邱城
卅年經公及齊侯過於魯濟 案水經濟水注濟水又
北逕微鄉東又北逕清亭東又北過穀城縣西又北
逕周首亭西魯濟蓋在微鄉清亭之間微鄉卽莊廿
八年冬所築郟也公羊傳作微清卽公及宋公過於
清是也此皆魯地濟水所經故謂之魯濟若過穀城
則謂之齊濟穀卽小穀與周首亭王子成父敗榮如
處皆齊濟所經又案郟國志濟北國齊地爲多是魯
濟又在濟水以南

卅一年傳城小穀 酈元曰濟水側岸有尹卯壘南去
魚山四十餘里是穀城縣界故春秋之小穀城

卅二年傳能投蓋於稷門 劉光伯規過云謂投車蓋過於稷門水經泗水注引服虔注云能投千鈞之重過門之上與劉意畧同皆勝杜注

問後於叔牙對曰慶父材 漢五行志劉向以爲夫人淫於二叔顏注二叔謂慶父及叔牙是慶父亦叔牙同黨故欲援立之非但爲母弟也

閔二年經齊人遷陽 漢志東海郡都陽縣應劭注云齊人遷陽是城陽國陽都縣應劭注云齊人遷陽故陽國是惠棟云一國兩屬未詳孰是璉案城陽陽都縣應劭已明言此故陽國是爲陽之舊都其後齊人遷之是自城陽陽都遷於東海都陽故應注都爲齊

人所遷酈元水經注亦以陽都爲陽故國齊人利其地而遷之與應說同

及密 酈元曰時密水出時密山莒地莒人歸共仲於魯及密而死是也杜注密魯地非

傳公與石祁子玦 禮記檀弓石祁子爲石駘仲之庶子鄭注駘仲衛大夫石碯之族

戰於熒澤 尙書滎波旣豬詩疏引鄭注云沈水溢出河爲澤今塞爲平地滎陽民猶謂其處爲滎澤

重錦卅兩 覲禮重賜無數鄭注重猶善也

用其衷則佩之度 白虎通曰所以必有佩者表德見所能也循道無窮則佩環能本道德則佩琕能決嫌

疑則佩玦申生太子當佩環佩琕方謂之度命之佩
玦是使之決於嫌疑之際而速之去也故罕夷曰金
玦不復

齊桓公遷邢於夷儀 漢志河內郡平臯縣應劭曰邢
侯自襄國徙此當齊桓公時衛人伐邢邢遷於夷儀
其地屬晉號曰邢邱以其在河之臯處勢平夷故曰
平臯瓚注云春秋狄人伐邢邢遷夷儀不至此今襄
國西有夷儀城去襄國一百餘里平臯是邢邱非國
也瓚案郡國志河內平臯有邢邱故邢國周公子所
封是平臯之邢邱本邢國也此非齊桓所遷之邢郡
國志東郡聊城有夷儀聚計邢國所都亦只在聊城

百里之內臣瓚謂在襄國西是也若平臯邢邱乃衛所滅復入於晉師古曰晉侯送女於邢邱卽此薛瓚駁應說甚精酈元不知春秋有兩邢國其河水注亦混兩國而統釋之其失始於應劭矣史記正義云邢邱在懷州武德縣東南廿里

僖元年傳公賜季友汶陽之田 酈元曰蚺水出剛縣東北太山西南流逕汶陽之田齊所侵也自汶之北平暢極目僖公以賜季友

二年經盟於貫 酈元曰汭水又東逕貫城南俗謂之薄城非也闕駟十三州志以爲貫城在蒙縣西北春秋僖公二年齊侯宋公江黃盟於貫杜預以爲貫也

云貫貫字相似貫在齊謂貫澤也是矣非此也今於
此地更無他城在蒙西北唯是邑耳

傳莫爲不道 水經注引土地名河東皮氏縣莫亭古
之冀所都是冀爲一國之證

入自顛幹 酈元曰傳巖東北十餘里卽巖幹坂

伐鄭三門 說文鄭晉邑郡國志沛國有鄭聚劉昭補

注引服虔曰鄭晉別都正義載服注云冀爲不道伐

鄭三門謂冀伐晉冀之旣病亦唯君故謂虞助晉按

劉昭妄引服注以釋沛國鄭聚爲晉邑殊謬然服注

鄭爲晉都與說文鄭爲晉邑此爲有據杜以顛幹坂

在大陽爲虞國地郡國志河東大陽縣有下陽城有

顛幹坂無鄭邑不可因其地近虞城遂臆斷爲虞邑也安知冀爲不道非兼伐虞晉兩國地墨子兼愛篇灑爲底柱水經河水注砥柱山在河東大陽縣東河中括地志云底柱山俗名三門山硤石縣東北五十里黃河之中鄭之三門疑卽砥柱也

四年經齊人執陳轅濤塗世系表云袁氏出自媯姓陳胡公滿生申公犀侯十世至爰孫宣仲濤塗賜邑陽夏以王父字爲氏

傳五侯九伯女實征之詩濬哲相土烈烈正義云說春秋者亦以太公爲司馬故得征五侯九伯

北至於無棣鄭元曰清河又東北無棣溝出焉京相

璠曰舊說無棣在遼西孤竹縣二說參差未知所定
然管仲以責楚無棣在此方之爲近案酈注是無棣
近南皮縣界

次於陘 史記楚世家兵侵楚至陘山戰國策曰楚地
有汾陘之塞尔疋山絕陘郭注連山中斷絕是凡山
之中斷絕者皆可謂之陘徐廣曰陘者山絕之名括
地志曰陘山在鄭州西南一百十里

方城 盛宏之荊州記曰葉東界有故城始犇縣東至
瀨水達比陽界南北聯聯數百里號爲方城一謂之
長城酈元曰楚盛周衰控霸南土欲爭強中國多築
列城於北方以逼華夏故號此城爲萬城或作方字

唐勒奏土論曰我是楚也世霸南土自越以至葉垂
宏境萬里故號曰萬城是方城卽楚長城之證高誘
淮南注以葉縣方城爲據是猶舉其一隅也

五年經楚人滅弦 酈元曰江水又東逕西陽郡南卽
西陽縣也晉書地道記以爲弦子國通典光州光山
縣漢西陽縣也春秋弦國之地仙居縣本漢軼縣今
縣東有弦亭據水經注通典漢之西陽軼縣皆弦子
地元凱第釋弦國在軼縣東南是乃元和郡縣圖志
所云弦國之都也

傳必書雲物 史記天官書歲正月旦旦至食爲麥食
至日昃爲稷昃至餽爲黍餽至下餽爲菽下餽至日

入爲麻各以其時雲物占種所宜鄭司農云以二至二分觀雲物青爲蟲白爲喪赤爲兵荒黑爲水黃爲豐

晉侯使以殺申生之故來告 閻百詩曰春秋之經爲聖人筆削純用周正傳則効采諸國之史而爲之故其閒有雜以夏正而不能盡革者讀者猶可以意得之璉案申生死在四年冬此傳用夏正之證經書在五年春此經用周正之證

美城其賜邑 周禮正義云三等采地皆有城郭是大夫之私邑皆有城郭故南遺城費申侯亦城其賜邑虞不臘矣 應劭風俗通曰周曰大蜡秦改曰臘蔡邕

月令章句曰周曰蜡秦曰臘是秦漢改蜡曰臘之證
呂覽作於秦時其孟冬月令云禱祖五祀戴記月令
始云臘先祖五祀戴記經漢儒更易故以秦漢閒語
入之左傳自邱明授曾申至荀卿授張蒼荀卿張蒼
秦漢閒人也故言虞不臘矣左傳非盡出邱明手是
其證朱子言秦時始有臘祭證諸秦漢諸書而益信
其有據惠君疑之禮運與於蜡賓世說注引五經要
義云三代名臘夏曰嘉平殷曰清祀周曰大蜡總謂
之臘此惠君說所本也

及其大夫井伯 史記張守節正義引南雍州記云宋
井伯宛人也

七年傳官受方物 如楚貢包茅之類

八年經盟於洮 酈元曰今鄆城西南五十里有姚城
或謂之洮

九年經於葵邱 酈元引春秋古地云葵邱地名今鄆
西臺是也鄆本齊桓公所置管子築五鹿中牟鄆以
衛諸夏是葵邱宜在鄆與宰孔勤遠畧之言相合

傳以是藐諸孤 杜訓藐爲幼賤顧亭林訓藐爲小惠
定宇本呂忱字林訓藐爲小兒笑貌皆非是爾疋釋
詁藐美也說文作𦉰美也大雅瞻仰篇藐藐昊天鄭
箋云藐藐美也方言藐廣也詩毛傳云藐藐大貌是
藐爲美大之稱言以是美大諸孤託在大夫可不善

爲保護乎

元案潘岳寡婦賦序孤女藐焉始孩李注引左傳藐諸孤孟子說大人則藐之趙注

宐有以輕藐之說文艸部藐此艸也皆幼賤意與杜訓合懇在說文心部訓美也徐鍇曰借藐字是凡藐

作美大訓者皆懇之假借

重賂秦以求入

呂覽重賂秦以地而求入高誘注地

河外之城五

十五年經楚人敗徐於婁林

郡國志下邳徐縣有樓

亭或曰古婁林

傳晉侯許賂中大夫

外傳云夷吾謂公子繫曰中大

夫里克與我矣吾命以汾陽之田百萬嬖大夫丕鄭

與我矣吾命之以負葵之田七十萬

東盡虢畧

鄭元曰澗水有二源俱導而東注虢畧在

陸渾縣西九十里

輅秦伯 呂覽載楚人救秦伯事甚詳左傳失載故敘
輅秦伯未甚明晰

舍諸靈臺 詩緯舍神霧曰作邑於豐起靈臺

史佚 大戴禮保傅篇引明堂禮云博聞強記接給而
善對者謂之承承者承天子之遺忘者也常立於後
是史佚也淮南子作尹佚高誘曰尹佚史佚也後漢
書翟酺傳云昔成王之政周公在前召公在後畢公
在左史佚在右禮記疏闕文史佚周初良史武王周
公成王時臣也鄭注史佚成王時賢史也疏闕文又
云史佚文王武王時臣故國語稱訪於辛尹尚書稱

逸祝冊是也璉案洛誥逸祝冊詩烈文疏引鄭注使
史佚讀所冊祝之書是史佚至成王時猶存故鄭注
爲成王時賢史

晉於是乎作爰田 漢書食貨志云民爰上田夫百畝
中田夫二百畝下田夫三百畝歲耕種者爲不易上
田休一歲者爲一易中田休二歲者爲再易下田休
三歲更耕之自爰其處璉案周制三年易田自是美
惡相均無貧富不均之患晉自武公得國以後授田
之制不均或有得不易上田者不復以中下之田相
易今晉惠欲加惠於國人或於平昔易田之外別加
厚焉服虔云爰易也賞畝以田易其疆畔所謂易其

疆畔者正是分別其一易再易之田界以施恩於國人也若如賈逵以田出車賦之解晉惠當去國之時民心未定豈復更張田法以驚擾愚民邪且與下文惠之至也不貫以子慎之說爲優矣

陰飴甥 陰地乃晉之重鎮左傳楚子使爲陰地之命

大夫士蔑飴甥晉惠心腹臣也故使爲陰地之命大夫瑕近桃林之塞在解與猗氏二縣之間晉近秦之重鎮或亦使飴甥處之張華博物志曰永安有呂鄉呂甥邑是瑕呂皆飴甥所處之邑故又名瑕呂飴甥杜解瑕呂爲姓謬甚酈元水經注又作瑕父呂飴展氏有隱惠焉 孟子王若隱其無罪趙岐注隱痛也

論語修愚孔安國注愚惡也漢五行志劉歆以爲人道所不及則天震之展氏有隱愚故天加誅於其祖夷伯之廟以譴告之也杜注本劉歆說

盟於王城 酈元曰涑水又西逕王官城北在南原上世人猶謂其城曰王城杜注馮翊臨晉疑遠

十六年經六鷁退飛 說文鷁作鵀或从鷁司馬相如說鵀从赤

十七年傳蔡姬 史記管蔡世家蔡繆侯以其女弟爲齊桓公夫人

十九年傳梁伯好土功 博物志曰今梁多有城

廿一年須胸 酈元曰杜預曰須胸在須昌縣西北非

也地理志曰壽張縣西北有胸城是也京相璠曰須胸一國二城兩名蓋遷都須昌胸是其本秦以爲縣璉案劉昭郡國志補注引杜預注云須句古國在須昌西北是須昌西北卽須胸也後乃遷都須昌耳京說是

廿二年傳蠡螿有毒 字林曰蠡螿人者閩西謂蠡曰蠡服虔通俗文曰長尾爲蠡

廿三年經春齊侯伐宋圍緡 闕駟十三州記曰山陽有東緡縣鄒衍曰余登緡城以望宋都者也酈元曰濟水又東逕東緡縣故城北故宋地

左執鞭弭 御覽引毛詩拾遺云左傳左執鞭弭弭者

弓之別名

秦伯納女五人 韓非外儲說秦伯嫁女於晉公子文
衣之媵七十人

奉匱沃盥 儀禮士昏禮夫入於室卽席婦尊西南面
媵御沃盥交鄭注媵送也謂女從者也御當爲訝訝
迎也謂壻從者也媵沃壻盥於南洗御沃婦盥於北
洗夫婦始接情有廉恥媵御交道其志秦以文嬴妻
文公以懷嬴爲媵令於晉文入室時使沃壻盥於南
洗也說文云匱似羹魁柄中有道可以注水

廿四年傳臣負羈紲 說文羈馬絡頭也服虔云犬羈
曰紲正義云係馬亦稱紲未確當从許慎服虔說以

羈爲馬縲紲爲犬縲猶言服犬馬之勞也

實紀綱之僕 呂覽用民篇云用民有紀有綱壹引其

紀萬目皆起壹引其綱萬目皆張正義引說文疏證
紀綱爲首領之帥詩棫樸篇綱紀四方鄭箋云以網
罟喻爲政張之爲綱理之爲紀書盤庚若網在綱有
條而不紊孔傳云下之順上當如網在綱各有條理
而不亂此紀綱之僕亦有條不紊之意訓爲首領之
帥甚確

寺人披 章懷後漢書注寺人披一名勃鞞字伯楚

其出也竊藏以逃 韓詩外傳云晉文公亡過曹里鳧
須因盜重耳資而亡

凡蔣邾茅胙祭 此六國皆畿內諸侯周有凡伯毛伯
祭伯杜注汲郡共縣東南有凡城郡國志河內共縣
汎亭劉昭注爲凡伯邑水經淮水又東過期思縣北
鄆元曰縣故蔣國周公之後郡國志云河內州平皐
有邾邱故邾國周公子所封說文云邾周公子所封
地也近河內懷鄆元曰洧陽有茅城水經濮水又東
逕胙亭東鄆元曰故胙國富辰所謂邾茅胙祭周公
之後也祭韋昭國語注以爲周公之後廣韻云周公
第五子所封

甘昭公 京相璠曰故甘城在河南城西廿五里鄆元
曰甘水東一十許里洛城南有故甘城北對河南故

城世謂之鑿洛城鑿甘聲相近卽故甘城爲王子帶之故邑是以昭叔有甘公之稱焉

及坎飲 酈元曰服虔以爲鞏東邑名晉太康地記晉書地道記竝言在鞏西非也

處於汜 酈元曰汜晉襄城郡治京相璠曰周襄王居之故曰襄城

好聚鵠冠 後漢輿服志云建華冠記曰知天者冠述春秋左氏傳曰鄭子臧好鵠冠前圓以爲此則是也說文云鵠知天將雨鳥也

侯宜多 世系表云侯宜多姬姓

廿六年經納頓子於頓 酈元曰潁水於獲嘉縣入潁

水至於頓故頓子國

傳殺之於隰城 酈元曰沙溝又東逕隰城北

廿六年傳齊孝公伐我北鄙 盧辨大戴禮保傳篇注
齊在魯北

室如懸磬 劉光伯曰如磬在縣下無粟帛說文磬器
中空也殷古文磬字磬器中盡也

廿七年傳先軫曰 劉光伯規杜云下蒐於被廬先軫
始佐下軍此時未爲下軍之佐

廿八年傳燕僖負羈氏 韓非子十過篇云文公令人
告僖負羈曰軍旅薄城吾知子不違也其表子之閭
寡人將以爲令令軍勿敢犯曹人聞之率其親戚而

保釐負羈之閭者七百餘家是燕釐負羈氏非獨負羈一家也

使門尹班 周禮小宗伯掌三族之別以辨親疏其正室皆謂之門子鄭注正室適子也將代父當門者也逸周書皇門解口會羣門又曰大門宗子蓋言欲族姓也惠天牧口宋襄戰於泓門官殲焉門官者軍之帥也向戍稱盧門合左師華元亦居盧門二族皆卿而爲軍帥謂之門官案惠說甚善故春秋時鄭卿之子謂之門子班蓋宋卿掌門尹之任如桐門右師之類周禮所謂帥以門名者是也楚圍急故使重臣如晉乞師詩緇衣正義引尙書闕四門鄭注云言四門

者亦因卿士之私朝在國門魯有東門襄仲宋有桐門右師是後之取法於前也案鄭注是卿之私朝在其所居之地卽以所居之國門名之春秋列國皆然非獨鄭卿之子稱門子也夏官帥以門名鄭注軍將皆命卿古者軍將蓋爲營治於國門魯有東門襄仲宋有桐門右師皆上卿爲軍將者也

唯西廣東宮與若敖之六卒 此疑是楚之軍政名杜臆解東宮爲太子之卒若敖六卒爲六百人皆謬

楚師背鄢而舍 郡國志東郡穀城有雋下聚

韞杜注在背曰韞 禮記檀弓篇子顯以致命於穆公

鄭注云使者公子鷖也引盧植注云古者名字相配

顯當作鞣鞣說文作驅馬腹帶也

元案史記禮書駁鞣徐廣曰鞣者當

馬掖之革

晉侯登有莘之虛 墨子尚賢中篇云伊摯有莘氏之

私臣呂覽有莘作有侁高誘注云侁讀曰莘有莘在

今河南陳畱縣陳畱風俗傳曰陳畱外黃有莘昌亭

括地志云古莘國在汴州陳畱縣東五里故莘城是

也

原田每每 周禮春官太卜掌三易之法三曰原兆鄭

注原原田也杜子春曰原兆有周之兆蓋晉之輿人

為卜以決晉楚之勝負卜得原田之兆春秋時周弱

楚強今卜得有周之兆是晉文可以定霸匡王而輔

佐周室以興王業矣舊謂楚新謂周是舍舊強之楚而謀新起之周也晉侯疑焉周爲楚弱久矣恐與人
之謀卜未定取信而猶懼敗於楚耳

樂枝使輿曳柴而僞遯 淮南兵畧訓曰曳梢肆柴揚塵起場所以營其目者此善爲詐佯者也

作王宮於踐土 荀子楊倞注明堂壇也謂巡狩至方岳之下會諸侯爲宮方三百步四門壇有十二尋深四尺加方明其上晉文蓋從天子巡狩之制故作宮於踐土如巡狩方岳之下同也

使子人九 正義據桓十四年鄭伯使其弟語來盟傳稱子人氏來盟是子人氏爲語之後杜譜以九爲雜

人謬矣

鄭伯傳王 儀禮覲禮四傳擯鄭注四傳擯者每一位
畢擯者以告乃更陳列而升其次公也侯也伯也各
一位子男俠門而俱東上亦一位也至庭乃設擯則
諸侯初入門王官之伯帥之耳古文傳作傳案此注
正是侯伯相王朝見諸侯之制尙書堯典賓於四門
鄭注賓擯謂舜爲上擯以迎諸侯馬注四門四方之
門諸侯羣臣朝者舜賓迎之此舜爲牧伯率諸侯朝
王之事哀十三年傳子服景伯對使者曰王合諸侯
則伯帥侯牧以見於王左傳周之東遷晉鄭焉依書
序王賜晉文侯秬鬯圭瓚作文侯之命是命晉侯爲

牧伯之證鄭與晉輔平王東遷或亦命爲牧伯故鄭伯傅王以朝見諸侯仍用平禮

瓊弁玉纓 服虔以爲馬飾與薛綜注西京賦同惠定字未引服注

盟於宛濮 酈元濟水注云酸水又東南會於濮世謂之百尺溝濮渠之側有漆城竹書紀年梁惠成王十六年邯鄲伐衛取漆富邱城之者也或亦謂之宛濮亭春秋甯武子與衛人盟於宛濮杜預曰長垣西南近濮水也京相璠曰衛地也似非關究而不知其所卅年傳許君焦瑕 郡國志宏農陝縣有焦城劉昭補注云故焦國瑕郡國志河東解縣有瑕城晉書地道

記曰河東猗氏縣東北瑕城是也案焦近華山瑕近解梁城

卅一年經猶三望 鄭康成曰望者祭山川之名諸侯之望祭山川在其地則祭之非其地則不祭且魯境不及河禹貢海岱及淮惟徐州徐卽魯地三望謂淮海岱

傳自洮以南 酈元曰瓠子故瀆又東逕桃城南春秋傳曰分曹地自洮以南東傳於濟盡曹地也

東傳於濟 水經注菏水東逕重鄉城南左傳所謂臧文仲宿於重館者也菏水又東逕武棠亭北公羊以爲濟上邑也城有臺高二丈許其下臨水昔魯侯觀

魚於棠謂此也在方與縣故城北十里經所謂菏水也是曹與魯境相接在菏濟二水之間今分曹田傳於濟蓋過重鄉以南矣

卅二年傳將殯於曲沃 周禮喪祝及朝御匱乃奠先鄭注朝謂將葬朝於祖考之廟而後行晉文卒將殯於曲沃就宗廟晉宗廟在曲沃

卅三年傳鄭商人弦高 淮南子人間訓篇云鄭之賈人弦高蹇他高誘注云蹇他弦高之黨

鄭之有原圃 水經注濟水又東逕原武縣故城南春秋之原圃也

婦人暫而免諸國 說文云突犬從穴中暫出也是暫

有倉卒疾奔之義詩大雅綿篇毛傳云駢突也鄭箋云驚走奔突原軫言婦人倉卒而令其突出以免難也元凱訓暫爲卒意未明晰

文元年毛伯通鑑外紀引王肅尙書注毛伯文王庶

子是畿內之國元凱解爲諸侯爲文王卿士者非是特祀於主烝嘗禘於廟有喪者三年不祭今新主既

祔於先祖之廟則三年之內練祥四時之祭皆祭新

主而不必祭羣廟之主矣故曰特祀於主待三年喪

畢則新主可以立廟祭而不祔於祖則凡烝嘗禘諸

祭皆祭於新主所立之廟矣故曰烝嘗禘於廟元案儀禮

士虞記鄭注凡祔已復於寢如既祫主反其廟練而後遷廟正義引服此傳注云特祀於主謂在寢烝嘗

禘於廟者三年喪畢遭
烝嘗則行祭皆於廟焉

傳及匡 鄆元曰陂水東逕匡城北城在新汲縣之東
北卽扶溝之匡亭亭在匡城鄉今陳畱長垣縣有匡
城卽平邱之匡亭襄邑又有承匡城然匡居陳衛之
閒亦往往有異邑矣

二年經躋僖公 周禮守祧正義曰惠公當昭隱公當
穆桓公爲昭莊公爲穆閔公當昭僖公爲穆今升僖
公於閔公之上爲昭閔公爲穆故云逆祀知不以兄
弟同昭位升僖公於閔公之上爲逆祀者定八年經
云從祀先公傳曰順祀先公若本同倫以僖公升於
閔公之上則以後諸公昭穆不亂何以定八年始云

順祀乎明本以僖昭穆別故以後皆亂也案禮器正義引服氏順祀先公而祈焉注云自躋僖公以來昭穆皆逆是賈公彥守祧正義躋僖公爲昭穆皆亂之解原本服虔左傳注

五年傳臯陶庭堅不祀 史記楚世家穆王四年滅六蓼臯陶之後禮記坊記陽侯殺繆侯淮南子繆侯作蓼侯高誘曰蓼侯偃姓庭堅之後

六年傳改蒐於董 司馬彪郡國志河東聞喜有董池陝古董澤劉昭引左傳改蒐於董董澤之蒲以注之是劉從司馬彪說以董與董澤同在聞喜也璉案鄜元涑水注涑水西逕董澤陂南卽古池東西四里南

北三里蒐於董卽斯澤也是酈元與司馬彪劉昭意同皆以董澤與蒐於董爲一地也元凱注改蒐於董在汾陰劉昭復於郡國志汾陰補注引之是又與聞喜縣注不同一地兩從蓋沿元凱之誤不若酈元注之簡明易曉也

殺諸郟 郡國志河東垣縣有郟亭襄廿三年傳戍郟郟是時齊侯伐晉入孟門登太行是郟郟乃晉河內適河東之隘道公子樂來自陳故使人殺之於此七年傳敗秦軍於令狐至於剝首 闕駟十三州志曰令狐卽猗氏也剝首在西十三里

八年傳且復致公壻池之封 服虔以爲致之於鄭上

宣子說之杜注言爲明年歸鄭衛田張本明以匡戚
爲衛地申虎牢爲鄭地何以此言并還衛正義言晉
令鄭歸衛田更謬

九年傳克壺邱 酈元曰汝水又東南逕壺邱城北故
陳也案水經注壺邱當在新蔡慎陽二縣之間

十年傳取北徵 漢地理志左馮翊有徵縣顏師古注
云徵音懲卽今之澄城縣左傳所謂取北徵卽此地
釋文引三蒼亦云縣屬馮翊徵懲古字通詩魯頌荆
舒是懲史記建元以來侯者年表作荆舒是徵顏籀
漢書音甚確蓋本自三蒼顏家訓載劉昌宗周官音
讀乘若承段玉裁曰廣韻乘食陵切音同繩承署陵

切音同丞徵音亦近繩也

王在渚宮 水經江水又東逕江陵縣故城南酈元曰
今城楚船宮地也春秋之渚宮矣

王使爲工尹 工尹蓋工匠之師如工尹路請劍圭以
爲楫秘可見

期思公 酈元曰期思縣故蔣國周公之後楚滅之以
爲縣是期思公乃楚縣公章懷後漢書注期思故城
在今光州固始縣西北

命夙駕載燧 蓋將焚林而田

十一年傳至於錫穴 水經漢水東逕魏興郡之錫縣
故城北酈元曰爲白石灘縣故春秋之錫穴地

以敗狄於長邱 水經濟瀆東逕封邱縣南燕縣之延鄉也其在春
酈元曰濟瀆東逕封邱縣南燕縣之延鄉也其在春
秋爲長邱

埋其首於周首之北門 水經濟水經周首亭西酈元
曰周首亭今世謂之盧子城濟北郡治也京相璠曰
今濟北所治盧子城故齊周首邑

齊王子成父 說苑晏子曰昔先君桓公軍吏怠戎士
偷則王子成父侍呂覽審分職篇管子曰平原廣城
車不結軌士不旋踵鼓之三軍之士視死如歸臣不
若王子成父請置以爲大司馬

十二年傳兩君之士皆未愨也 詩召旻篇不愨遺一

老鄭箋云慙者心不欲自彊之辭孔疏說文云慙肯
從心也言初時心所不欲後始勉彊而肯從故云心
不欲自強之辭爾疋云願也強也且也釋文引韓詩
云慙閭也說文引作三軍之士皆未息案此慙亦宜
訓爲願言交綏之戰兩軍之士皆未快與說文未息
意相近杜本字林訓爲缺與下文懼我也不甚融貫
十三年傳使詹嘉處瑕 郡國志河東猗氏縣劉昭案
地道記云左傳文十三年詹嘉處瑕在縣東北杜注
同劉昭解縣瑕城補注引之京相璠云瑕城在解縣
酈元曰涑水又西南逕解縣故城南春秋晉惠公因
秦返國許秦以河外五城內及解梁卽斯城也涑水

又西南逕瑕城晉大夫詹嘉之故邑也是酈元解瑕地在解縣與京說同

以守桃林之塞 晉太康地記曰桃林在闕鄉南谷中
三秦記曰桃林塞在長安東四百里

邾文公卜遷於繹 胡三省通鑑辨誤曰漢地理志魯國鄒縣繹山在北括地志云鄒繹山在兗州鄒縣南
廿三里蓋縣有遷徙故漢時繹山則在縣北唐時則
在縣南

十四年傳宋高哀爲蕭封人 蕭封人蕭邑大夫

十五年傳惠叔猶毀以爲請 戴記喪服小記曰久而
不葬者惟主喪者不除穆伯踰年而不得葬故惠叔

猶服斬衰之服而毀以爲請

襄仲欲勿哭 襄仲於穆伯從父兄弟也當服小功五月今穆伯踰年未葬則襄仲已以麻終小功五月之數而除喪久矣故以爲無服則勿哭然本爲兄弟之親且未葬者雖時已除喪及其葬也反服其服而可以勿哭乎

十六年傳麋人率百濮聚於邈 穎容釋例云麋在當陽案盛宏之荊州記云江陵縣東有綠林山襄陽大路經由其西所謂當陽之綠林也是當陽在江陵縣東邈蓋楚東地故麋自當陽聚師於此

魚人 水經江水又東逕魚復縣故城南酈元曰故魚

國也是魚乃羣蠻之一非庸地劉昭注巴郡魚復云
古庸國是猶沿元凱之誤

十七年傳敗戎於邠垂 酈元曰服虔曰邠垂在高都
南杜預釋地曰河南新城縣北有邠垂亭司馬彪郡
國志曰新城有高都城今亭在城南七里遺基存焉
京相璠曰舊說言邠垂在高都南今上黨有高都縣
余謂京論疎遠未足以證無如虔說之指密矣

十八年傳公遊於申池 此齊海濱之菽淮南子可證
若襄十八年傳焚申池之竹木當如京杜注申池爲
齊城門下言焚東郭北郭可證酈元亦知焚申池之
竹木非在海隅故其淄水注云不言北掠於海惠定

宇不知申池有二專以京注之說為非未見明晰元

水經淄水注於申門外之申池為懿公被害處即文

十八年焚竹木之申池也思君以淮南地形訓申池

在海隅易之且云若近在城南不須言歸舍爵案鄭

子西追盜入於北宮乃歸授甲子言辨舍爵於季氏

之廟皆非遠地而言歸

言舍爵不足以難杜也

此十六族 劉光伯云各有大功皆賜氏族故稱族

世濟其美 詩生民篇正義云左傳之說八元云世濟

其美者正以能承父業即稱為世不要歷數世也

謂之饗饗 尚書釋文竄三苗於三危馬融注三苗國

名縉雲氏之後為諸侯饗饗也

流四凶族 史記集解引尚書分北三苗鄭注云流四

凶者卿為伯子大夫為男降其位耳猶為國君故以

三苗爲西裔諸侯猶爲惡乃復分析流之

春秋左傳補注卷第一終